

後梁春秋

文勤公舊藏
公昉越孫謹署



後梁春秋二卷

浙江汪啟淑家藏本

明姚士舜撰士舜所輯陸氏易解已著錄是書以後梁主蕭
詒為武帝冢孫空嗣梁祚武帝奪嫡而立簡文卒致覆滅而
詒附魏立國凡歷三主三十三年乃亡能保其祀北史及周隋二
史傳傍摭文集因時表事因事附人排比具詳其間如詒通
魏後即用北魏紀年而不書太清之號以絕元帝於梁又於陳
諸帝皆直書其名以示黜貶之意然詒為昭明第三子原非必
應得國之人其立也又非受國於武帝值是時弟兄構釁同
氣相屠借魏朝兵力獲奉宗祧僅區區守江陵三百里之地身
為附庸北面事人其事實無可稱士舜此書與以南唐為正



統者同一偏僻王士禎居易錄稱士舜有此書惜未見之殊不知其無可取也士舜又嘗為西魏春秋若干卷蓋亦以補魏收書之闕今佚不傳

後梁春秋序



余讀姚子所著後梁春秋而知奪嫡之不祥仁賢之有後天道若陰為劑量不爽眉髮者吁可畏也蓋六代賢胤無過昭明不幸以一眚慚歿嫡冢失嗣至有梁神器一歸

之簡文再歸之孝元兩君固皆武
帝子也藉令天意而在兩君則當
使之長有天下子孫永享願兩君
無論身死人手而聯翩血胤斬刈
不翅艸菅孝元兇忍固宜簡文儒
弱而諸子斷割尤酷僅僅遺一大

圜豈梁武奪嫡之際簡文亦不無
陰計于其間邪乃宣帝父子則雖
羈棲一旅值以彈丸荆土依託周
魏用抗彊陳者三十餘載而兩主
稱帝諸子為王昆孫蕃衍七葉宰
相與唐盛衰終始豈非上天明戒

奪嫡默報仁賢之意乎更觀一時
為孝元破長沙害河東者莫僧辯
若也而僧辯之死似實假手霸先
至于後梁股肱若蔡王岑柳諸姓
莫不顯著隋唐而文本亦復作相
天意從可知矣此意冥秘千古永

有能道之者適濮陽明府以此書
相示因共謀梓使此意灼然昭垂
于千百年後且謂姚子編述是書
不獨在繼絕存亡已也姚子名士
粦經生而貧力于古者尚有西魏
春秋余為廩之以需其成萬歷丁

未夏日蜀人李作舟書于采石舟

中

後梁春秋序



後梁春秋者何曰姚子以親親而尊尊賢
賢而惡惡內內而外外續梁統也親親者
何宣帝為梁武孫昭明子于派為嫡于名
為順簡文孝元處非其據咸以凶終帝以
三世嗣梁歷載三十有三神明之胄可无
統乎尊尊者何陳氏偷有神器僭假名號

朕梁有一日未亡之胤則有一日未亡之
號故其上則有帝后太子諸王下則有公
侯令僕文武以及即位崩薨贈諡之法雖
小朝廷可无位號乎賢賢者何釋裴政之
誅昭忠也聽柳遐之歸旌孝也蔡大有李
廣許孝敬書官書死明節也來微沈重崇
儒也歸我三州美字小也惡惡者何張纘

伏誅惡禍本也還師江陵殺河東王譽罪
孝元也帝殺殷亮明宇文殺也復置江陵
總管著隋志也內內而外外者何華皎內
附與其歸也城安湘伐公安不克我所宜
讎也吳明徹章昭達入寇統在我也容星
犯楚熒惑犯太微天象在梁也所謂內也
陳篡梁而不備書讎相篡也周魏之際陳

氏諸王僅各一書所謂外也若夫太清二
年梁猶未亡尋繼以魏之大統此從宣帝
志也實所以明孝元之无父也何也宣帝
以賢儲宗胤不容于孝元將駢首就戮若
河東桂陽則蕭氏宗脉无噍類矣不得已
而附魏以全宗也附魏則書魏統也孝元
以全楚兵力樂其父兄之危擁兵不下第
與宣帝兄弟讎殺坐致父兄死于逆景之
手固不得為人君且不得為子為弟為臣
三綱絕矣是梁不亡于敬帝而亡于孝元
矣書以魏統盖用王通氏以元嘉遇弒其
後不復備書以魏太和繼之之義也此余
以春秋之意許姚子以尊尊而親親賢賢
而惡惡内内而外外續梁統之說也

賜進士第文林郎知嘉興縣事安成顏欲
章撰

後梁春秋序

乙巳冬余自上高徙官海鹽
即聞詞賦家有姚君願以
一日之長時得見諸名下獨
不見所謂姚君者明年秋
試士幸以想見面目副我耳

中姓名私心以為失夫固不
易呈身者竊重之會習學
合州李公意欲獎士格外而
難其人余與年丈安來顏
公謀曰非姬君不足當此因
名以姬君進併進所著後

梁喜秋李公為擊之而賞之
曰是可有聞於世者遂原費
舍使屬千秋蓋異數也未
幾李公移楚命余鍍梓星
書用備史家散佚余惟後
梁以附庸見北史周隋二書

所載三十三季，間真滅事跡，
不過數頓而盡。乃姚君博考，
我籍，準下經書，子因事附人，
旁引曲證，拓演來一代規模，
觀此，則梁武之祀經，止于江
陰，而若於未止陳霸先，雖篡
有梁，而若猶未篡，何者？及梁
先陳二年，止入隋，既蜀先魏
二年，止入晉，等耳。特恨頓
圓狹小，人才屈弱，介於周隋
之間，不得如昭烈，從漢大書
綱目之為快也。然朱子亦從始

稱帝至于隋滅梁書凡數
見夫亦不忍亡梁之意乎且
是書採綴類皆南北菁英
外編奇逸展覽煥然足為
蜀檮杌吳越備史法書之別
謀編年小史中之荀表也今

正史梁書為陳吏部尚書姚
察所撰而姚君復撰後梁書
秋何姚氏後先猷厚於蕭梁
如此但後梁強能姚君不顯
而姚君非受知李顏二公不問
更去代系史史乘人、事於

刻余六幸分二邑所刻極為
序其始末若友懷貶予奪
之微則有李顏二公之大序
在

萬曆丁未秋仲託陵濮陽喜
書于雙瑞堂

後梁春秋上

海鹽姚士舜編述

中宗宣皇帝

中大通三年夏六月封皇孫曲江公譽為岳陽
王王字理孫高祖武皇帝之孫昭明太子之第
三子也母係林龔氏以天監十八年生于東宮
七歲封為曲江公幼而好學尤長佛義特為高
祖所嘉賞及昭明薨後以長子東中郎將南徐
州刺史華容公歡封豫章郡王次子枝江公譽

封河東郡王曲江公登封岳陽郡王警封武昌
郡王警封義陽郡王各三千戶女悉同正主蔡
妃供侍一同常儀唯別立金華宮為異初昭明
母丁貴嬪薨太子遣人求得善墓地將斬草有
賣地者因闔人俞三副求市若得三百萬許以
百萬與之三副密啓武帝言太子所得地不如
今所得地為上吉高祖末年多忌便命市之墓
畢有道士善圖墓云地不利長子若厭伏或可
申延乃為蠟鵝及諸物埋墓側長子位有宮監

鮑邈之魏雅者二人初竝為太子所愛邈之晚
見疎於雅密啓高祖云雅為太子厭禱高祖密
遣檢掘果得蠟鵝等物大驚將窮其事徐勉固
諫得止于是唯誅道士由是太子迄終以此慙
慨故其嗣不立後邵陵王臨丹陽郡因邈之與
鄉人爭婢議以為誘略之罪牒東宮簡文追感
太子寃揮淚誅之邈之兄子僧隆為宮直前未
知邈之姪即日驅出走是人間謠曰鹿子開城
門城門鹿子開當開復未開使我心徘徊城中

諸少年逐歡歸去來鹿子開者反語為來子哭
云帝哭也歡前為南徐州太子果薨遣中書舍
人臧厥追歡于崇政殿解髮臨哭歡既嫡孫次
應嗣位而遲疑未決高祖既新有天下恐不可
以少主主大業又以心銜故意在晉安王猶豫
自四月上旬至五月二十一日方決歡止封豫
章王還任往謠言心徘徊者未定也城中諸少
年逐歡歸去來復還徐方之象也歡字孟孫位
雲麾將軍江州刺史中大通六年十二月薨謚

陽形勝之地又是高祖創基之所時平足以樹
根本世亂可圖霸功遂剋已勵節樹恩於百姓
務修刑政志存綏養乃下教曰昔之善為政者
不獨師所見藉聽衆賢則所聞自遠資鑒外物
故在矚致明是以龐參郵民蓋訪言干高逸馬
援居政每貴成于椽史王沉爰加厚賞呂虔功
有所由故能顯美政于當年流芳塵于後代吾
以陋識來牧盛藩每慮德不被民政道或紊中
宵拊枕對桉忘饑思納良謨以匡弗逮雍州部

內有不便于民不利于政長吏貪殘戍將悞弱
關市恣其裒刻豪猾多所苞藏竝密以名聞當
加釐正若刺史治道之要弛張永允循酷乖理
任用違才或愛狎邪佞或斥廢忠謇彌思啓告
用祛未悟鹽梅舟楫允屬良規苦口惡石想勿
余隱并廣示鄉閭知其款意於是境內稱治時
魏賀蘭祥鎮荊州性甚清素王與通好乃以竹
屏風締綌之屬及以經史贈之祥難違王意取
而付諸所司魏朝聞之竝以賜祥

曰安王子棟嗣譽字重孫普通二年封枝江縣
公中大通三年改封河東郡王除寧遠將軍知
石頭戍軍事出為琅邪彭城二郡太守還除侍
中輕車將軍置佐史高祖既廢嫡立庶海內嚙
嗜故各封諸子大郡以慰其心岳陽流涕受拜
累日不食因進宣惠將軍知石頭戍事琅邪彭
城二郡太守

大同四年秋七月以王為東揚州刺史領會稽
太守初昭明太子卒高祖捨王兄弟而立簡文

內常媿之故寵亞諸子以會稽人物殷阜故有此授以慰其心王既以其昆弟不得為嗣常懷不平又以高祖衰老朝多秕政有敗亡之漸遂蓄聚貨財交通賓客招募輕俠折節下之其勇敢者多歸附焉左右遂至數千人皆厚加資給王嘗於會稽作游七山寺賦詞甚亢致

中大同元年冬十月以王為使持節都督雍梁東益南北秦五州郢州之竟陵司州之隋郡諸軍事西中郎將領寧蠻校尉雍州刺史王以襄

太清三年夏四月以湘州刺史張纘為雍州刺史王不受代纘字伯緒范陽方城人父宏策從高祖起義天監初封洮陽縣侯為孫文明作亂見害纘尚高祖第四女富陽公主拜駙馬都尉封利亭侯起家秘書郎歷尚書僕射湘州刺史好學負才氣無所與讓及改雍州刺史聞河東王譽當代已纘素輕少譽州府候迎及資待甚薄譽深銜之及至州遂託疾不見纘仍檢括州府度事留纘不遣會聞候景寇建業譽當下援

湘東王時鎮江陵與纘有舊纘將因之以斃王
兄弟時譽率軍下青州湖臺城沒有詔班師譽
自江口將旋湘鎮纘乃貽湘東書曰河東戴檣
上水欲襲江陵岳陽在雍其謀不逞時湘東已
至武城乃覆船沉米斬纘而歸荆湘因構嫌隙
纘遂棄其部曲携其二女單舸赴江陵湘東遣
使責讓譽索纘部下仍遣纘向雍州王推遷未
去鎮但以城西白馬寺處之王猶總軍府之政
會聞賊陷臺城王遂不受代○秋八月侯景圍

京師王遣司馬劉方貴帥師入援景字萬景魏
之懷朔人也驍勇善騎射如事爾朱榮以擒葛
榮功封濮陽郡公及高歡誅爾朱氏景以衆降
仍為歡用後以司徒南道行臺擁衆十萬專制
河南及歡疾篤謂子澄曰侯景狡猾多計反覆
難知我死後必不為汝用澄乃為書召景景知
偽懼禍因用王偉計遣其行臺郎中丁和來上
表請降高祖召羣臣延議尚書僕射謝舉等議
皆云納景非宜高祖不從於是封景河南王太

將軍使持節都督河南北諸軍事大行臺承制如鄧禹故事高澄嗣事遣其將慕容紹宗計景景敗于渦陽景乃馳以敗聞自求貶削優詔不許復求資給即授南豫州刺史本官如故會魏人更求和親高祖召公鄉謀之張綰朱異咸請許之景聞未之信乃偽作鄴人書求以貞陽侯換侯景帝將許之舍人傳岐曰侯景以窮歸義棄之不祥且百戰之餘寧肯束手受繫謝舉朱異曰景奔敗之將一使之力耳高祖從之復書

曰貞陽旦至侯景夕反景謂左右曰我知吳兒老公薄心腸景遂發兵及以誅朱異徐麟陸驗周石珍為辭高祖聞之笑曰是何能為吾以折筆答之乃勅斬景者不問南北人同賞封二千戶兼一州刺史更詔鄱陽王範等為都督詩景又令邵陵王綸持節董督衆軍景聞之謀于王偉偉曰莫若直掩揚都臨賀反其內大王攻其外天下不足于也兵聞控速便須進路不然邵陵及人景遂報云游獵山軍偽向合肥遂襲譙

州進攻歷陽董紹先莊鐵等皆降之乃復為導
自采石濟師都下弗之覺也而新除都督京師
軍事臨賀王正德舉衆應景景即分襲姑孰遂
至慈湖時庾信王質水陸禦景咸棄軍奔敗景
因乘勝至闕圍逼臺城于是湘東王檄所督諸
州竝發兵下赴國難檄至王以湘東與河東結
隙令蔡大寶使江陵以觀之湘東素知大寶見
之甚悅乃示所製元覽賦令注解焉三日而畢
湘東大嗟賞之贈遺甚厚大寶還白王云湘東

必有異圖禍亂將作不可下援臺城王納之乃
遣方貴領兵為前軍出漢口赴援○湘東王繹
還師江陵殺信州刺史桂陽王慥于獄繹字世
誠高祖第七子也天監十三年封湘東王太清
元年為鎮西將軍荊州刺史三年自稱假黃鉞
大都督中外諸軍承制及簡文遇弒即位江陵
是為孝元帝時湘東入援軍次于郢州之武城
諸軍頓江津竝未之進既而有敕班師湘東欲
旋中記室參軍蕭賁曰景以人臣奔兵向闕今

若放兵未及渡江童子能斬之必不為也大王以十萬之師未見賊而退若何湘東不悅賁骨鯁士也每恨湘東不入援嘗與湘東雙陸食子未下賁曰殿下都無下意湘東深為憾遂因事害之慥字元貞長沙宣武王之孫桂陽敦王象之子嗣位領信州刺史有威惠太清三年援臺城遇敕還藩慥欲待湘東至謁督府方還州尋為張纘所搆江陵游軍王朱榮又遣使報湘東云桂陽住此欲應譽譽湘東惧乃水陸兼行自

蠻中步道馳歸江陵慥尚軍江津不以為意湘東至乃召慥深加慰喻慥心乃安後留止省內慥心知禍及遂肆醜言湘東大怒付獄殺之○劉方貴叛據樊城王遣將攻斬之初湘東王繹之人援也令所督諸州皆發兵王遣府司馬劉方貴領兵為前軍出漢口及將發湘東又使諮議參軍劉毅喻王令自行王辭頗不順湘東大怒而方貴先與王不協潛與湘東相知剋期襲王未及發會王以他事召方貴方貴疑謀洩遂

據樊城拒命王遣魏益德杜岸等衆軍攻之方
貴窘急令其子遷超乞師于江陵湘東乃厚資
遣張纘若將述職而密援方貴纘次大隄樊城
已陷王擒方貴兄弟及党與竝斬之○六月湘
東王遣世子方等攻湘州刺史河東王譽譽擊
之方等敗死復遣信州刺史鮑泉攻湘州九月
王帥師救之敗績先是湘東王遣諮議參軍周
宏直至譽所督其糧衆譽曰各自軍府何忽隸
人前後使三反譽竝不從湘東大怒乃遣世子

方等征之方等字實相湘東長子每曰徐妃少
聰敏有俊才善騎射初徐妃以嫉妒失寵方等
意不自安會侯景亂因請入援臺城歸荊州收
集士馬甚得衆和湘東始歎其能及河東王不
受督府之令方等更乞征之拜為都督令率精
卒二萬南討至麻溪河東王率軍逆戰方等擊
之軍敗遂溺死時年二十二謚曰忠壯泉字潤
岳東海人也博涉史傳兼有文筆少事湘東早
見擢任及湘東承制累遷至信州刺史太清三

年秋七月湘東命泉征河東王譽于湘州泉至長沙與書陳示禍福許其遷善譽不答修浚城也為拒守之計謂泉曰敗軍之將勢豈譽勇乎欲前即前无所多說泉軍于石榔寺譽率衆遂擊之不利而還泉進軍橘洲又盡銳攻之不剋會已暮士卒疲弊泉因出擊大敗之斬首三千級溺死者萬餘人譽于是焚長沙郭邑徙居民于城內泉遂度軍圍其城久未能拔九月湘東乃數泉罪遣王僧辨代泉為都督譽告急于王

王乃留諮議參軍蔡大寶守襄陽率衆二萬騎二十伐江陵以救之于時江陵立柵周遶郭邑而北面未就王因攻之湘東大駭乃遣參軍庾奩謂王曰正德四亂天下崩離汝復效尤將欲何謂吾蒙先帝愛顧以汝兄弟見屬今以姪伐叔逆順安在王謂奩曰家兄無罪累被攻圍同氣之情豈可坐觀成敗七父若顧先恩豈應若是如能退兵湘水吾便旋旆襄陽乙卯王至江陵作十三營以攻之不克退而築城又盡銳攻

之會大雨暴至平地水四尺王軍中沾漬衆頗
離心其將杜岸岸弟幼安及其兄子龕懼王不
振以其屬降于江陵王衆大駭遁歸襄陽器械
輜重多没于澧水○雍州刺史張纘伏誅王初
以構其兄弟事始于纘將密圖之纘惧清湘東
召之湘東乃徵纘于王王留不遣州助防杜岸
兄弟給纘曰民觀岳陽殿下勢不仰容使君素
得物情若走人西山招聚義衆遠近必當歸集
又率部下繼至以義舉無往不剋纘深以為然

岸既襄陽豪族兄弟九人皆以驍勇著名纘因
與岸兄弟結盟纘又要雍州人席引等于西山
聚衆乃服婦人衣乘青布輦與親信十餘人出
奔引等杜岸馳告王王令中兵參軍尹正共岸
等率兵追討纘衆望岸軍大喜謂是赴期既至
即執纘并其衆俘送之始被囚繫纘惧不免請
為沙門名法緒王許之王襲江陵常載纘隨後
逼使為檄固辭以疾及軍退敗行至澧水南防
守纘者慮追兵至遂殺之棄屍而去○夏四月

王遣蔡大寶進屯武寧初王聞侯景克郢州遣
蔡大寶將兵一萬進據武寧遣使至江陵詐稱
赴援衆議欲答以侯景已破令其退軍湘東曰
今語以退軍是趣之令進也乃使謂大寶曰岳
陽累啟連和不相侵犯卿那忽據武寧今當遣
天門太守胡僧祐精甲二萬鉄馬五千頓澧水
待時進軍答聞之召其軍還○杜岸寇襄陽中
兵參軍尹正討岸誅之岸字公衡少有武幹從
王伐江陵與其弟翦幼安等叛歸湘東湘東以

為持節平北將軍北梁州刺史封江陵縣侯邑
一千戶岸因請以五百騎襲襄陽湘東許之岸
晝夜兼行去城三十里城中覺之蔡大寶乃輔
王母保林龔氏登陴閉門拒戰時王自江陵知
其師掩襄陽且岸等襄陽豪帥於是夜通歸襄
陽王夜至龔氏不知其敗歸謂為賊也至曉見
王乃納之岸等知王至遂奔其兄南陽太守嚟
于廣平王遣尹正薛暉等討岸會周將權景宣
率步騎三千來助攻拔之獲嚟岸等并其母妻

子女竝斬于襄陽北門王母龔氏數岸于衆岸
曰老婢教汝兒殺汝叔乃枉殺忠良王命拔其
舌齧殺而烹之盡誅諸杜宗族親者幼弱下蚕
室又發其坟墓燒其骸骨灰而揚之并以其頭
為漆椀○冬十月湘東王遣柳仲禮寇襄陽仲
禮河東解人也祖慶遠侍中領軍將軍父津太
子詹事仲禮勇力無人少有胆氣起家著作佐
郎稍遷電威將軍歷司州刺史初侯景潛圖反
噬仲禮先知之屢啟求以精兵三萬討景及景

反諸藩赴援見推總督臺城陷仲禮開營首降
援軍聞之莫不歎憤論者以為梁禍始于朱异
成于仲禮仲禮入城先拜侯景而後見高祖高
祖不與言遣令西上至江陵會王伐江陵湘東
以仲禮為雍州刺史襲襄陽仲禮方觀成敗未
發及南陽圍急杜岸請急仲禮乃以別將夏侯
強為司州刺史守義陽自帥衆如安陸使司馬
康昭如竟陵討孫嵩嵩執魏戍人符貴以降仲
禮命其王叔孫為竟陵太守副軍馬岫為安陸

太守置孥于安陸而以輕兵師于滎頭將圍襄陽○王遣諮議參軍蔡大寶聘于魏魏使榮權來報命王既與江陵相攻恐不能自固乃遣使稱藩請為附庸于魏魏丞相宇文泰令丞相府東閣祭酒榮權使為王大悅大寶字敬位濟陽考城人祖履齊尚書祠部郎父點梁尚書儀曹郎南充州別駕大寶少孤而篤學不倦善屬文初以明經對策第一解褐武陵王國左常侍嘗以書干僕射徐勉大為勉所賞異乃令與其子

游處所有墳籍盡以給之遂博覽羣書學无不綜王初出第勉仍荐大寶為侍讀兼掌記室尋除尚書儀曹郎及王出鎮會稽大寶謁選曹求諮議不得以為記室領長流大寶攘臂而出曰不為孫秀非人也王蒞襄陽遷諮議參軍謀謨皆自大寶出權北平无終人魏散騎常侍兵部尚書○世子劼如魏時柳仲禮將圍襄陽王惧乃遣其妃王氏及劼為質請救于魏魏榮權報命仍遣開府楊忠率兵援之劼字道遠王之長

子也母曰宣靜皇后幼聰敏有成人之量及王為梁王立為世子尋病卒

魏大統十六年春正月魏開府楊忠擒柳仲禮據其軍忠小名奴奴宏農華陰人也祖烈龍驤將軍父禎建遠將軍忠身長七尺八寸武藝絕倫識量深沉有將帥之畧從魏孝武西遷進爵小黃縣侯嘗從安定公泰獵于龍門忠獨當一猛獸左扶其腰右拔其舌泰壯之北人謂猛獸為揜于因以字之先是仲禮以兵騎一萬寇襄

陽忠與行臺長孫儉將兵救王乃進圍仲禮長史馬岫于安陸仲禮恐安陸不守遂馳歸赴援諸將恐仲禮至則安陸難下請急攻之忠曰攻守勢殊未可卒拔若引日勞師表裏受敵非計也南人多習水軍不閑野戰仲禮回師在近路吾出其不意以奇兵襲之彼怠我奮一舉必克則安陸不攻自拔諸城可傳檄定也于是選騎二千銜枚夜進遇仲禮于滹頭忠親自陷陣擒仲禮及其弟季禮悉俘其衆安陸竟陵皆降而

王乃獲安忠乘勝至石頭欲進逼江陵湘東遣舍人庾恪說忠曰荅來伐叔而魏助之何以使天下歸心忠遂停漣北湘東遣其子方畧為質并送載書請魏以石城為限梁以安陸為界乃旋師湘東與邵陵王書荅引楊忠來相侵逼頗遵談笑用邵秦軍曲直有在不復自陳臨湘旦平暮便即路郡陵得書投之于案慷慨流涕○魏遣常侍鄭孝穆榮權來錫梁王之命時魏朝議欲令王發喪嗣位王以未有璽命辭不敢當

時榮權在王所乃馳還具言其狀魏遂令穆等持節策命王為梁王乃于襄陽置百官承制封拜穆字道和滎陽開封人魏將作大匠渾之一世孫祖敬叔魏潁川濮陽郡守父瓊范陽郡守孝穆幼而謹厚以清約自居年未弱冠涉獵經史孝昌初解褐太尉行參軍歷岐州刺史考績為天下最徵拜京兆尹十五年議遣梁使盛選行人歷觀內外无逾孝穆者十六年乃假孝穆散騎常侍持節策拜王為梁王使還稱音進

車騎大將軍儀同三司加散騎常侍位至少司空卒謚曰貞○夏五月王僧辯陷湘州殺河東王譽時湘東遣王僧辯圍長沙既久內外斷絕邵陵王綸聞其急欲往救之為軍糧不繼遂止乃與湘東書勸其罷兵大畧謂方今社稷危耻創巨痛深人非禽蟲在知君父即日大敵猶強天讎未雪余爾昆季在外三人唯應剖心嘗胆泣血枕戈共思康復其餘小忿或宜寬貸誠復子憾須臾將柰國寃未逞正當輕重相推小大

易奪今已喪鍾山復誅狝子將非楊湯止沸吞冰療寒夫征戰之理義在克勝至于骨肉之戰愈勝愈酷捷則非功敗則有喪勞兵損義虧失多矣湘東復書陳河東有罪不可解圍之狀綸省書流涕曰天下之事一至于斯湘東又遣王僧辯代鮑泉攻譽僧辯築土山以臨城內旦夕苦攻矢石如雨城中將士死傷者大半譽窘急乃潛裝海船將潰圍而出會其麾下將慕容華引僧辯入城譽顧左右皆散遂被執謂守者曰

勿殺我得一兄七官申此讒賊死亦无恨王者
曰奉命不許遂斬之傳首荆鎮湘東反其首以
葬焉初譽之將敗也私引鏡照面不見其頭又
見長人蓋屋兩手據地瞰其齋又見白狗火如
驢從城而出不知所在譽甚惡之俄而城陷僧
辯字君才右衛將軍神念之子也起家為湘東
王左常侍湘東承制為領軍將軍及荆湘疑二
軍師失律湘東又命僧辯及鮑泉統軍討之剋
日就道僧辯謂泉曰我與君俱受命南討而軍

容若此計將安之泉曰既稟廟算驅承驍勇事
等沃雪何所多慮僧辯曰君言故是文士之常
談耳河東少有武幹兵刃又強新破軍師養銳
待敵自非精兵一萬不足以制之我竟陵甲士
數經行陣已遣召之不久當及雖期日有限猶
可重申欲與卿共入言之望相佐也泉許之及
見湘東迎問曰卿已辯乎何日當發僧辯其對
如內所言湘東大怒按劍厲聲曰卿憚行邪因
起入內泉震怖失色竟不敢言頃臯遣左右收

僧辯既至湘東因斫之中左髀流血至地僧辯
悶絕久之方蘇即送付廷尉會岳陽王襲江陵
未知其備湘東遣左右往獄問計僧辯具陳方
畧即赦為城內都督俄而岳陽兵退乃命僧辯
往代鮑泉遂平湘州後以克復舊京功封永寧
郡公侍中尚書令為陳霸先所殺○世子劼薨
大定元年追謚孝惠太子

魏廢帝元年夏六月王至自魏大統十七年至
留蔡大寶居守雍部而朝于兩魏宇文泰謂王

曰王之來此頗由榮權王欲見之乎王曰幸甚
泰乃召權與王相見仍謂之曰榮權吉士也孤
與之從事未嘗見其失信王曰榮常侍通二國
之言无私故登今者得歸誠魏闕耳

魏恭帝元年冬十月遣柱國于謹等帥師會王
伐江陵破之是歲秋七月梁元帝遣使請據舊
圖以定疆界又連結于齊言辭悖慢安定公泰
曰古人有言天之所棄誰能與之其蕭繹之謂
乎會王亦乞師伐江陵冬十月遣柱國于謹中

山公護大將軍楊忠韋孝寬等步騎五萬討之
秦餞謹于青泥谷長孫儉問謹曰為蕭繹之計
將欲何如曰耀兵漢沔席卷渡江直據丹陽是
其上策移郭內居民退保子城峻其陴堞以待
援至是其中策若難于移動據守羅郭是其下
策儉曰揣繹定出何策謹曰必用下策儉曰彼
棄上而用下何也對曰蕭氏保據江南綿歷數
紀屬中原多故未遑外畧又以我有齊氏之患
必謂力不能分且繹悞而无謀多疑少斷愚民

難與慮始皆戀邑居既惡遷移當保羅郭所以
用下策也師至襄陽王率衆會之謹乃令中山
公護及大將軍楊忠等率精騎先據江津斷其
走路梁人豎木柵于外城廣輪六十里尋而謹
至悉衆燒柵圍之會大風城內火燒居人數千
家夜有流星墜城中元帝援著筮之卦成瓦龜
式驗之因抵于地曰吾若死此下豈非命乎遣
胡僧祐朱買臣等出戰為謹所破謹遂大攻元
帝出枇杷門親臨督戰胡僧祐中流矢死累敗

反者斬西門守卒以納魏師謹字思敬河南洛陽人性深沉有識畧窺經史尤好孫子兵書歷功封燕國公謹既破梁俘男女十餘萬人收其府庫珍寶得宋渾天儀梁日晷銅表魏相風烏銅蟠螭趺大玉徑四尺圍七尺及諸輦輦法物以入于朝軍无私焉○魏人執裴政于王釋之裴政字德表河東聞喜人也祖邃梁侍中父之禮廷尉卿政幼明敏博聞強記達于時政為當時所稱父喪出服問訊武帝貶瘦枯槁涕泗滂

沱武帝目送之曰裴之禮不死也累功封夷陵侯復帥師副王琳拒蕭紀及魏師圍荊州琳自桂州來赴難次于長沙政請從間道先報元帝至百里洲為魏師所獲王謂政曰我武皇帝之孫也不可為爾君乎亦何煩殉身于七父若從我計則貴及子孫如或不然分腰領矣政詭曰惟命王鏐之送至城下便謂元帝曰王僧辯聞臺城被圍已自為帝王琳孤弱不復能來政許之既而告城中援兵大至各思自勉吾以間使

被擒當以碎身報國監事者擊其口終不易辭
王怒命趣行戮蔡大業諫曰此民望也若殺之
則荊州不可下矣因得釋江陵陷送于魏京宇
文泰聞其忠授負外散騎侍郎○冬十二月魏
人殺梁主繹江陵既陷元帝乃焚古今圖書十
四萬卷以寶劍擊柱折之歎曰蕭世誠一至此
乎文武之道今夜盡矣命王孝祀作降文曰馬
素衣出門王使鐵騎擁之入營囚于烏幔之下
甚見詰辱他日乃見魏僕射長孫儉譎儉云埋

金千斤于城內欲以相贈儉乃將帝入城帝因
述王相辱狀謂儉曰向聊相譎欲言耳豈有天
子自埋金乎儉乃留帝于主衣庫及在幽逼求
酒飲之製詩四絕至遣尚書傅準監行刑帝謂
之曰卿幸為我宣行準捧詩流淚不能禁進土
囊而殞之王使以布帊纏屍斂以蒲席束以白
茅以車一乘葬于津陽門外年四十七敬帝追
尊為孝元皇帝
大定元年春正月王即皇帝于江陵東城于謹

既平江陵魏恭帝立王為梁主都江陵資以荆
郡其西平州延袤三百里之地其襄陽所統盡
入于魏王乃稱皇帝改元大定追尊其父統為
昭明皇帝廟號高宗統妃蔡氏為昭德皇后尊
所生母龔氏為皇太后立妃王氏為皇后其廢
賞刑威官方制度軍車服節文並同王者唯上
疏魏朝則稱臣奉魏正朔至于爵命其下亦依
梁氏之舊其戎章勳級又兼用柱國等官又追
贈叔父邵陵王綸太宰謚曰壯武贈兄河東王

譽丞相謚曰武桓○立世子歸為皇太子歸字
仁遠帝之第三子也母曹貴嬪以大同八年生
于會稽歸俊辯有才學兼好內典善于撫御能
得其下歡心○封皇子巖為安平王岌東平王
岑河間王故安成王子欣為安成王巖字義遠
帝第五子也性仁厚善于撫接歷侍中荊州刺
史尚書令太尉太傅岌帝第六子也性淳和幼
而好學位至侍中中衛將軍岑字智遠帝第八
子也初封河間王後改封吳郡王位至太尉性

簡貴御下嚴整有三子瓚球瑁欣高祖弟安成
康王秀之孫煬王機之子也幼聰警博綜文籍
善屬文宣帝踐位以欣襲机封天保之朝為一
代文宗專掌詞令歷侍中中書令尚書僕射尚
書令○徵雍州刺史蔡大寶為侍中尚書令往
帝為梁王承制封拜除大寶為中書侍郎兼吏
部掌大選事領襄陽太守遷負外散騎常侍吏
部郎俄轉吏部尚書軍國之事咸委決焉加授
大將軍遷尚書僕射進號輔國將軍又除使持

節宣惠將軍雍州刺史至是帝徵為侍中尚書
令參掌選事又加雲麾將軍荊州刺史進位柱
國軍師將軍領太子少傅轉安前將軍封安豐
縣侯邑一千戶○以襄陽郡守岑善方為太府
卿善方字思義南陽棘陽人漢征南太將軍彭
之後也祖惠甫給事中父祖敬騎侍郎善方有
器局博綜經史善于辭令以刑獄參軍隨帝至
襄陽帝初請附魏以善方兼記室充使詣魏應
對閑敏深為宇文泰所嘉自此往來凡數十反

魏恭帝二年授驃騎大將軍開府儀同三司封長寧縣公帝之承制也授中書舍人遷襄陽郡守及是徵為太府卿領中書舍人轉大府領舍人如故尋遷散騎常侍起部尚書○以尚書左丞王操為五兵尚書操字子高其先太原晉陽人帝母龔太后之外弟也祖靈慶海鹽令父景休臨川內史操性敦厚有籌略博涉經史在公恪動初為帝外兵參軍親任亞于蔡大寶帝承制除尚書左丞及稱帝遷五兵尚書大將軍郢

州刺史尋進位柱國封新康縣侯○以前五經博士沈重為中書侍郎重字德厚吳興武康人也性聰悟有異常童弱歲而孤居喪合禮及長專心儒學從師不遠千里遂博覽羣書尤明詩禮及左氏春秋大通三年起家王國常侍高祖欲高置學官以崇儒教中大通四年乃革選以重補國子助教大同二年除五經博士元帝之在藩也甚歎異之及即位乃遣主書何武迎重西上及江陵平重乃留事帝除中書侍郎兼中

書舍人累遷負外散騎侍郎廷尉卿領江陵令
還拜通直散騎常侍都宮尚書領羽林監令重
于合歡殿講周禮○以前著作佐郎柳詵為侍
中領國子祭酒詵字顧言本河東人也永嘉之
亂徙家襄陽祖恢梁侍中父暉都官尚書詵少
聰敏解屬文好讀書所覽將萬卷仕梁釋褐著
作佐郎及帝踐阼以詵為侍中領國子祭酒吏
部尚書詵有俊辯有所顧問應答如響入隋位
至秘書監封漢南縣公○以秘書郎王浞為侍

中吏部尚書浞琅邪臨沂人祖琳侍中太府卿
父錫侍中浞少有令譽尚帝妹廬陵長公主歷
秘書郎太子舍人宣城王友廬陵內史帝踐阼
授侍中吏部尚書○以前少府卿沈巡為金紫
光祿大夫巡吳興人父僧叟左民尚書太清中
巡為東陽太守侯景平元帝徵為少府卿荊州
陷帝署巡為金紫光祿大夫天保五年卒于江
陵巡子君理時為陳東陽太守請身迎巡喪朝
議以在位重臣難令出境乃遣兄君巖迎柩還

葬○以法曹參軍柳莊為中書舍人莊字思敬
河東解人也祖季遠梁司徒從事中郎莊少有
遠量博覽羣籍兼善辭令濟陽蔡大寶有重名
于江左時為岳陽工諮議參軍見莊便歎曰襄
陽水鏡復在于茲矣大寶遂以女妻之俄而帝
辟為參軍轉法曹及帝踐阼還署中書舍人歷
給事黃門侍郎吏部郎中鴻臚卿○以前中書
舍人劉臻為中書侍郎臻字宣摯沛國相人也
父顯梁潯陽太守偏精班漢人稱為漢聖臻年

十八舉秀才為邵陵王東閣祭酒元帝時遷中
書舍人嘗讀班史呼田宵為田肯元帝問之臻
曰臣家舊本以雌黃改宵為肯帝無以難之江
陵平復歸帝以為中書侍郎後為周家宰宇文
護辟為記室為露門學士封饒陽縣子隋文受
禪進位儀同三司皇太子勇引為學士臻耽悅
經史終日覃思至于世事多所遺忘有劉訥者
亦任儀同俱為太子學士情好甚密臻嘗欲尋
訥謂從者曰汝知劉儀同家乎從者不知尋訥

謂臻還家引之而還既扣門臻尚未悟謂至訥
家乃據案大呼曰劉儀同可出矣其子迎門臻
驚曰此汝亦來邪其子答曰此是大人家於是
顧盼久之乃悟○以徐矩為度支尚書矩東海
人尚書左僕射簡肅公勉之子有文學善吏事
頗黷于貨賄子敬鴻臚卿○以前法曹參軍柳
清為尚書度支郎靖字思休遐之長子少方雅
博覽墳籍梁大同永釋褐武陵王國左常侍六
定初除尚書度支郎遷正負郎後隨父入周歷

河南德廣二郡守隋文踐極特詔徵之靖遂以
疾固辭優游不仕閉門自守所對惟琴書而已
開皇中以壽終○以大將軍魏益德為車騎將
軍益德襄陽人也有才幹胆勇過人數從軍征
討以功累遷至郡守帝鎮襄陽以益德為其府
司馬帝承制拜將軍尋加大將軍及稱帝進位
柱國封上黃縣侯邑千戶加車騎將軍○以大
將軍尹正為護軍將軍正其先天水人帝鎮雍
州正為其府中兵參軍擒張績獲杜岸皆正之

力帝承制以為將軍尋拜大將軍及稱帝除護
軍將軍進位柱國封新野縣侯邑千戶子德毅
○以將軍尹德毅為大將軍德毅多權略初江
陵平德毅詔帝曰臣聞人主之行與匹夫不同
匹夫者飾小行競小廉以取名譽人主者定天
下安社稷以成大功今魏虜貪恠罔顧吊民伐
罪之義必欲肆其殘忍多所誅夷俘囚士庶並
為軍實然此戚屬咸在江東念其充餌豺狼見
拘異域痛心疾首何日能忘殿下清宇宙紹

茲鴻緒悠悠之人不可門到戶說其塗炭至此
咸謂殿下為之殿下既殺人父兄孤人子弟人
盡讎也誰與為國但魏之精銳盡萃于此犒師
之禮非死故事若殿下為設享會因請于謹等
為翟彼无我虞當相率而至預伏武士因而斃
之分命果毅掩其營壘斬馘逋醜俾无遺噍江
陵百姓撫而安之文武官僚隨即銓授既荷更
生之惠孰不忻戴聖明魏人懾息未敢送死王
僧辯之徒折簡可致然後朝服濟江入踐皇極

續堯復禹萬世一時晷刻之間大功可立古人
云天與不取反受其咎時至不行反受其殃願
殿下恢宏遠略勿懷匹夫之行帝不從謂德毅
曰卿之此策非不善也然魏人待我甚厚未可
背德若遽為卿計則鄧祈侯所謂人將不食吾
餘也既而闔城長幼被虜入關又失襄陽之地
帝乃追悔曰恨不用尹德毅之言以至於後
以見疑賜死○以將軍薛暉為大將軍暉河東
人也有才略身長八尺形貌甚偉嘗督禁旅為

帝瓜于當禦海之仕與尹正改獲社岸于南陽
帝承制拜將軍尋加大將軍進位柱國除領軍
將軍○以莫勇為武州刺史魏永壽為巴州刺
史是年五月庚辰勇及永壽為侯平所破見虜
○以中衛范通為東平王長史通順陽人尚書
右丞廸之弟也文采劣于廸而經術過之○前
侍中驃騎大將軍柳遐乞歸襄陽許之遐字于
異幼而爽邁神彩嶷然篤好文學動合規矩起
家邵陵王府法曹參軍謝舉為僕射引遐與語

甚嘉之日江漢英靈見于此矣帝鎮雍州選為
治下尋遷別駕及于襄陽承制授遐吏部郎負
外散騎常侍俄遷軍騎大將軍儀同三司大都
督賜爵聞喜縣公尋進位持節侍中驃騎大將
軍開府儀同三司及帝即位于江陵以襄陽歸
于西魏遐乃辭帝曰陛下中興鼎運龍飛舊楚
臣昔因幸會早奉名節理當以身許國期之始
終自晉氏南遷臣宗族蓋寡從祖太尉世父儀
同從父司空並以位望隆重遂家金陵唯留先

臣獨守坟柏嘗誠臣等使不違此志今襄陽既
入北朝臣若陪隨鑿蹕進則无益塵露退則有
虧先旨伏願曲垂照鑒亮臣此心帝重違其志
遂許之因留鄉里以經籍自娛及帝崩遐舉哀
行舊君之服○二月梁王方智立○魏以楊忠
鎮穰城時魏與帝初定江陵乃令忠鎮穰城以
為犄角之勢○王琳遣潘純陀等寇襄陽琳字
子珩會稽山陰人也父顯嗣梁湘東王國常侍
琳本兵家元帝居藩琳姊妹並入後庭見幸琳

由此得在左右以軍功封建寧縣侯廣州刺史
元帝為魏圍逼徵琳赴援師次長沙江陵已平
琳乃為元帝舉哀三軍縞素因據湘州志圖匡
復乃遣其將潘純陀侯方兒來寇帝出師禦之
純陀等退歸夏口

二年車騎將軍魏益德卒詔贈司空謚曰忠壯
天保五年以益德配饗中宗宣皇帝廟○春二
月帝擊侯平于公安湘州刺史王琳聞江陵已
陷遣別將侯平攻梁帝乃擊平於公安平與長

沙王韶引兵還長沙琳遣平鎮巴州○王琳稱
臣于帝初侯平頻攻梁軍以琳兵威不接更不
受指揮琳討之平殺巴州助防呂旬收其衆奔
江州琳勢益衰乃奉表詣齊獻馴象江陵之陷
也琳妻子皆沒于魏曰獻款于魏稱臣于帝以
求妻子

三年春正月魏宇文覺廢其主廓為宋公自稱
周天王○柱國尹正卒詔贈開府儀同三司謚
曰剛天保五年以正配饗中宗宣皇帝廟○秋

九月周宇文護弒其主覺立寧都公毓為主○
冬十月陳霸先篡梁自稱皇帝廢其主為江陰

三

四年大將軍王操帥師取王琳長沙武陵南平
三郡時上游諸將不受琳指麾雖屢寇梁師老
兵疲不能進帝乃遣操率兵略取琳之三郡○
五年夏五月王琳破監利郡太守蔡大有死之
琳遣其將雷文柔襲陷監利郡殺太守蔡大有
尋而琳與陳人相持稱藩乞師于帝帝許之師

未出而琳軍敗附于齊○皇太子歸聘于周是
歲遣太子歸朝于周以蔡大寶領太子少博○
六月陳霸先殂兄子蒨立○秋八月周主始稱
皇帝

六年夏四月大雨雷震前殿殿崩壓殺二百餘
人○周宇文護弒其主毓毓弟魯公邕立○甄
元成卒元成字敬平中山人博達經史善屬文
少為簡文所知以錄事參軍隨帝鎮襄陽轉中
記室參軍掌書記頗參政事以江陵甲兵殷盛

遂懷二心密書與梁元帝申其誠款遂有得其書者進之于帝帝深信佛法常願不殺誦法華經入元成素誦法華經遂以此獲免帝後見之常曰甄公好得法華經力歷位中書侍郎御史中丞祠部尚書吏部尚書卒贈侍中護軍將軍有文集二十卷○散騎常侍岑善方卒善方性清慎有當世幹能故帝委以機密大定七年卒增大常卿謚曰敬所著文集十卷有七子並有操行之元之利之象最知名之元太子舍人早

卒周武帝錄善方之功追之利之象入朝授之利帥都督代王記室參軍後仕隋歷安固令郴義江三司馬零陵郡丞之象掌式中士隋公相府參軍事後仕隋歷尚書虞部員外侍郎邵陵上宣渭南邯鄲四縣令子文本相唐太宗卒謚曰憲

七年春正月湘州城主殷亮以城降陳先是江陵既陷巴襄之地皆入于周周使梁守之陳太尉侯瑱將兵逼湘州周賀若敦將兵救之未幾

已陵城主尉遲憲降陳于是亮亦以湘州降宇文護以敦失地无功除名為民○秋九月乙巳客星見于翼客星者周伯老子王蓬絮國皇温凡五星皆客星也行諸列舍十二國分野其下之國皆受其禍其占色黃得地色白有喪色青有爰色黑有死色赤有兵各以五色占之皆不出三年又占曰有白衣之會人主惡之又翼為楚分為明年帝崩之應○前尚書右僕射張綰卒綰字孝卿少与兄續齊名湘東王嘗策之百

事綰對闕其六號為百六公歷位御史中丞大同四年元日舊制僕射中丞坐位東西時當兄續為僕射及百司就列兄弟並道騶分騶兩途前代未有時人榮之出為豫章内史進豫州刺史十年復為御史中丞綰再為司憲糾彈无所迴避豪右憚之太清三年為吏部尚書臺城陷奔江陵位尚書右僕射魏剋江陵朝士皆俘入關綰以疾免帝以舊位禮之八年春二月壬寅熒惑犯太微占曰熒惑主死

喪太微天子之庭也又曰雖有明天子必視榮
惑所在其犯太微主命惡之○夏六月周以荆
安州襄州江陵為四州總管西魏既平江陵使
帝承梁祚復置江陵防主統兵居于西城名曰
助防外示助梁備禦內實兼防梁也大定初以
長孫儉權景宣為江陵防主周武帝改為總管
至是分江陵為總管以田宏陸騰高琳等相繼
為之○帝崩葬平陵帝自失襄陽之地又見邑
居殘毀干戈日用恥其威略不振常懷憂憤乃

著愍時賦以見意焉其詞曰嗟余命之外薄寔
賦運之逢屯既殷憂而彌歲復坎墮以相隣書
營營而至晚夜耿耿而通晨望否極而云泰何
杳杳而無津悲晉璽之遷趙痛漢鼎之移新无
田范之明略愧夷齊之得仁遂胡顏而苟免謂
小屈而或申宣妖沴之无已何國步之長淪悵
少生而輕弱本无志于瓜牙謝兩章之雄勇忍
二東之英華豈三石于鄠杜異五馬于琅邪直
受性而好善類蓬生之在麻莫无咎而需慶將

保靜而蠲邪何昊穹之弗惠值上帝之紆奢神
州鞠為茂艸赤縣遠于長蛇徒仰天而太息空
撫衿而咨嗟惟古人之有懷尚或感於知己况
託芻于霄極寵渥流于死已或小善而必褒時
片言而見美音待罪于禹川歷三考而无紀獲
免戾于明時遂超隆于宗子始解印于稽出即
驅傳于湘水彼南陽之舊國實天漢之嘉祉既
川岳之形勝復龍躍之基趾此首賞之謬及謂
維城之足恃值諸侯之携貳遂留滯于樊川等

勾踐之絕望同重耳之終焉望南枝而洒泣或
東顧而潺湲歸歟之情何極首丘之思邈朕忽
值魏師入討于彼南荆既車徒之絕赫遂一鼓
而陵城同寤生之舍許等小白之全邢伊社稷
之泯泯實有感于恩靈矧吾人之固陋迥飄薄
于流萍忽沉滯于茲土復晷月而无成昔方千
而畿甸今七里而砮縈寡田邑而可賦闕立井
而求兵无河内之積待同滎陽之未平夜騷騷
而擊柝晝子子而揚旌烽凌雲而迥照馬伏櫪

而悲鳴既有懷于斯日亦焉得而云寧彼雲夢
之舊都乃標竒于昔者驗往記而瞻今何名高
而寔寡叔寥井邑荒涼原野徒揄揚于宋玉空
稱嗟于司馬南方卑而歎屈長沙濕而悲賈余
家國之一匡庶興周而祀夏忽縈憂而北屈豈
年華之天假加以狗盜鼠竊蜂蠆狐狸羣圍隸
而為寇聚滅獲而成師窺覲津渚跋扈江湄屢
征肇于殷歲頻戰起于軒時有扈興于夏典探
芑著于周詩方叔振于蠻貊伯禽捷于淮夷在

逋穢其能兪會斬馘而搴旗彼積惡之必稔豈
天靈之我欺交川路之云擁理惆悵而未怡帝
在位八載年四十有四葬之平陵謚曰宣皇帝
廟號中宗帝少有大志不拘小節雖多猜忌而
知人善任使撫將士有恩能得其死力性不飲
酒安于儉素事龔太后以孝聞又不好靛色尤
惡見婦人雖相去數步遙聞其臭經御婦人之
衣不復更著並皆棄之一幸姬媵病卧累旬又
惡見人髮白事者必方便避之担輿者冬月必

須裏頭夏月則加蓮葉帽其在東揚州嘗謁釋
曇彥彥曾與許詢同建浮圖未成而詢亡彥以
長年至梁見帝是詢後身彥呼帝曰許元度來
何暮昔日浮圖今如故帝曰弟子姓蕭名登彥
乃以三昧力加被帝恍然悟前身也但頗放誕
省覽簿領好為戲弄之言以此獲訊于世薦好
文義所著文集十五卷內典華嚴般若法華金
光明義疏四十六卷並行于世帝疆土既狹居
常怏怏每誦老驥伏櫪志在千里烈士暮年壯

心不已未嘗不盱衡扼腕歎咤者久之遂以憂
憤發背而崩帝之在藩及居帝位以蔡大寶為
股肱王操為腹心魏益德尹正薛暉許孝敬薛
宣為爪牙甄元成劉盈岑善方傅準褚珪蔡大
業典衆務張綰以舊齒處顯位沈重以儒學蒙
厚禮自餘多所獎拔咸盡其器能史臣曰宣帝
任術好謀知賢養士盖有英雄之志霸王之略
焉及淮海版蕩骨肉猜貳擁衆自固稱藩北朝
終能據有全楚中興顏運雖土宇殊于舊邦而

位號同于曩日貽厥自遠享國數世可不謂賢哉

後梁春秋上

後梁春秋下

海鹽姚士舜編述

世宗孝明皇帝

天保元年皇太子歸即皇帝位即位之元年尊祖母龔太后曰太皇太后嫡母王皇后為皇太后所生曹貴嬪為皇太妃○立東陽王琮為皇太子琮字溫文性寬仁有大度倣不羈博學有文義兼善弓馬遣人伏地著帖琮馳馬射之十發十中持帖者亦不懼初封東陽王至是立

為皇太子○立王子璿為義興王璿字欽文明
帝第二子也幼有令譽能屬文位荊州刺史頗
有能名崔宏度兵至鄱州璿懼與叔父巖奔于
陳陳主以為侍中安東將軍吳州刺史甚得物
情三吳父老皆曰吾君之子也及陳亡吳人推
之為主吳人見梁武簡文及宣明二帝兄弟中
並第三而踐尊位璿自以明帝第三子深自矜
負有謝異者頗知廢興梁陳之際言无不驗江
南人甚敬信之及陳主被擒異奔于璿由是益

為眾所歸褒國公宇文述以兵討之璿遣王褒
守吳州自將拒述述遣兵別道襲吳州褒衣進
士服棄城而遁璿眾聞之悉无鬪志與述一戰
而敗璿將左右數人逃于大湖匿于民家為人
所執送述所斬之長安時年二十一○以柱國
蔡大寶為司空中書監王操為尚書僕射帝冊
授寶司空中書監中權大將軍領吏部尚書寶
固讓司空許之加特進○以散騎常侍蔡大業
為都官尚書大業字敬道大寶之弟有至行父

沒居喪過禮性寬恕學涉經史有將命材屢充使詣北朝初命以西中郎將參軍隨宣帝之鎮及踐阼歷尚書左丞開遠將軍監利郡守散騎常侍衛鄉帝嗣位遷都官尚書除貞毅將軍漳州太守入為左民尚書太常卿○以柳洋為吏部尚書洋河東解人祖悛尚書左僕射父昭中書侍郎洋有文學以禮度自拘與王湜俱以風範方正為當時所重位至吏部尚書出為上黃郡守梁國廢以郡歸隋授開府儀同三司尋卒

○以袁敞為吏部郎敞陳郡人祖昂司空父士俊安城內史敞少有器量博涉文史以吏部郎使詣周時主者以敞班在陳使之後敞固不從命主者詰之敞對曰昔陳之祖父乃梁諸侯之下吏也棄忠與義盜有江東今大周朝字萬國招攜以禮若使梁之行人陳之後便恐彞倫失序豈使臣之所望焉王者不能屈遂以報奏武帝善之乃詔敞與陳使異日而進還以稱旨遷侍中轉左民尚書從後帝入隋授開府儀同

三司終于譙州刺史子謚謙○以甄詡為中書舍人詡元成之子少沉敏閑習政事歷中書舍人尚書右丞從後帝入隋授開府儀同三司終于太府卿○以韋琳為中書舍人琳京兆人南遷于襄陽天保中為中書舍人博學有才藻善劇談好臧否人物眾畏其口常擬孔稚珪嘗為鮒表以託刺當時其詞曰臣鮒言伏見除書以臣為糝熬將軍油蒸校尉臠州刺史脯腊如故肅承明命灰身屏息憑籠臨鼎載兢載惕臣聞

高沙走姬非有意于綺羅

江陵城西二十里有高秀湖其中有魚

白綃女兒豈期心于珠翠

江陵西湖紫鱗河臣美愧

夏鱸味慙冬鯉常恐鮎服之譏懼貽鼈巖之誚

是以漱流湖底枕石泥中不意高賞殊宏曲蒙

鈞拔遂得超昇綺席忝預玉盤爰廁玳筵猥煩

象筋澤覃紫腴思加黃腹方當鳴薑動桂紆蘇

佩櫂輕飄繞動則樞槩如雲濃汁暫停則蘭膏

成列宛轉綠蓋之中逍遙朱唇之內銜恩啞澤

丸殞弗辭不任屏營之誠謹到銅鐺門奉表以

聞詔答曰省表其知鄉池沼措紳陂渠俊又穿
蒲入荇肥滑有聞允堪茲選无勞謝也時人惡
之或以訊誚聞孝明亦弗之罪也其文傳于江
表○以蔡允叅為著作佐郎允恭太寶之子美
姿容工為詩最知名起家著作佐郎太子舍人
梁亡入陳拜尚書庫部郎陳亡入隋授起居舍
人煬帝有所賦必令諷誦遣教宮人允恭恥之
數稱疾授內史舍人俾入官固辭由是疎斥帝
遇弒經事宇文化及竇建德歸唐為秦王府參

軍文學館學士貞觀初除太子洗馬卒著後梁
春秋○以東陽王師徐岳為太子詹事岳尚書
僕射開府儀同三司簡肅公勉之少子度支尚
書矩之弟也少方正博通經史初為東陽王琮
師琮為皇太子授詹事及嗣位除侍中左民尚
書俄遷尚書僕射從後帝入隋授上開府儀同
三司終于陳州刺史子凱秘書郎○以秘書郎
王衡為太子洗馬衡尚書令操之子也操七子
衡最知名有才學起家秘書郎歷黃門郎○以

沈君公為義興王師君公吳興人君游之弟有
幹局美風儀文章典正特為帝所重歷中書黃
門侍郎御史中丞自都官尚書為義興王璫師
從璫奔陳授侍中太子詹事隋平陳以璫同謀
度江伏誅○夏五月太皇太后龔氏崩諡曰元
太后○秋九月皇太妃曹氏薨諡曰孝皇太后○
二年春正月皇太后王氏崩諡曰宣靜皇后○
領軍將軍薛暉卒贈開府儀同三司有六子建
子尚知名

三年春二月中書監蔡大寶卒大寶卒帝哭之
慟自卒及葬三臨其喪贈司徒進爵為公諡曰
文凱配饗中宗宣皇帝廟大寶性嚴整有智謀
雅達政事文詞贍速國之章表書記教令詔冊
並大寶專掌之宣帝推心委任以為謀主時人
以帝之有大寶猶劉先主之有孔明焉所著文
集二十卷及尚書義疏並行于世有四子次子
延壽

四年夏四月陳主蒨殂太子伯宗立○吏部尚

書王浚卒于周浚于天保四年使詣周卒于賓
館贈侍中右光祿大夫子瓘有文詞黃門侍郎
○周遣使來徵沈重周武帝以重經明行修廼
遣宣納上士柳裘至梁徵之仍致書曰皇帝問
梁都官尚書沈重觀夫八聖六君七情十義殊
方所以會軌異代于是率由莫不趣大順之遙
途履中和之盛致及青緇起焰素篆從風文逐
世疎義隨運舛大禮存于玉帛之間至樂形于
鐘鼓之外雖分蛇聚緯郁郁之辭蓋闕當塗典

午抑抑之旨旣聞有周開基爰蹤聖哲拯蒼生
之已淪補文物之將墜天爵具修人紀咸理朕
夤奉神器恭維寶闕常思復禮殷周之年遷化
唐虞之世懼三千尚乖于治俗九變未叶于移
風欲定畫一之文思杜二家之說知卿學冠儒
宗行標士則卞寶復潤于荆陰隋照更明于漢
浦是用寤寐增勞瞻望軫念爰致束帛之聘翹
車之招所望鳳舉鴻騫俄而萃止明斯隱滯合
彼異同上庠弗墜于微言中經罔闕于逸義近

取无獨善之訊遠應有兼濟之美可不盛歟昔
申培鮒背方辭東國公孫黃髮始造西京遂使
道為執基功參治本今者一徵諒兼其二若居
形骸而去影響尚迷邦而忘觀國非所謂也又
敕襄州總管衛公直敦喻遣之在途供給務從
優厚保定未重至京師詔令討論五經并校定
鐘律天和中復于紫極殿誦三教義朝士儒生
桑門道士至者二千餘人重辭義優洽樞機明
辨凡所解釋咸為諸儒所推六年授驃騎大將

軍開府儀同三司露門博士仍于露門館為皇
太子講論○遣杜元茂等城安湘先是帝遣杜
元茂神僧訓等帥師城漸水以東陳刺史符元
舉啓聞陳寓書于周冢宰宇文護曰國有三慶
民有四安所謂通和是由隣睦况周陳款好一
紀于茲懷抱相期百世方遠灌瓜之美久敕邊
吏拾椽之尤想應无忽梁氏以漸水東為安湘
小郡宜立巴州多歷年所此于荆部本包分界
近得刺史符元舉啟稱蕭歸忽遣杜元茂神僧

訓等將率人馬踰淄涉澌便置城隍謀為侵軼
適荷隣德合州見還不容今眷仍縱蕭氏元舉
累移論及翻相河漢更往研問便騁鋒鏑彼軍
人恃勇遂致俘擒聞此紛紜甚以驚歎其商奄
餘孽才力甚微為暴邊城良憑大國但情均忌
器不可如兵便教軍司以禮相放且前歲所大
疆城本以南平等五郡輸荐貴朝至如安湘既
屬巴郡幸承隣惠无俟涉言放下漸東唯如澧
北政是標其大桶屬荊州之界耳彼此方申分

好義絕規圖所貴唯和所重唯信夫以南平等
郡地曠民豐雲夢之田楚王為寶吳當勁蜀晉
拒疆秦資彼山川並為州鎮朕若棄其仁義務
廣封域寧容延歲並貢周朝今者和親已固山
岳而方謀尺寸之土用益蕪葭之地哉幸非竊
疾相見鑒容江陵小寇既爾虔劉前至之言或
相誣罔一二因使人宇文平口具其懷耿耿故
此相白

五年夏五月陳湘州刺史華皎巴州刺史戴僧

朔內附華皎晉陵暨陽人世為小吏梁代為尚書比部令史侯景之亂事景之黨王偉陳武帝南下文帝為景所囚皎遇文帝甚厚及景平文帝為吳興太守以皎為都錄事深見委仕及文帝平杜龕仍配以甲兵御下分明善于撫接解衣推食多少必均天嘉元年封懷仁縣伯王琳東下皎隨侯瑱拒之琳平知江州事後隨都督吳明徹征周迪迪平以功進爵為侯仍授都督湘州刺史皎起自下吏善營產業又征川洞多

致銅鼓及生口並送都下廢帝即位改封重安縣公韓子高誅後皎內不自安光大元年密啟求廣州以觀時主意宣帝偽許之而詔書未出皎亦遣使勾引周兵又崇奉帝為主送其子元響為質仍請代陳帝授皎司空巴州刺史戴僧朔衡陽內史任蛮奴巴陵內史潘智度岳陽太守章昭裕杜陽太守曹宣湘東太守錢明並隸于皎又長沙太守曹慶等本隸皎下亦為之用戴僧朔吳郡錢塘人也有膂力勇健善戰族兄

右將軍僧錫甚愛之僧錫年老征討恒使僧朔
領衆平王琳有功僧錫卒仍代為南丹陽太守
鎮采石從征留異侯安都于巖下出戰為賊斫
傷僧朔單刀步援以功除壯武將軍北江州刺
史領南陵太守又從周迪有功遷巴州刺史假
節將軍如故○六月彗星犯上将長一丈閏六
月歲星太白合在柳占云太白為兵象柳為周
分占為內兵又曰主人凶憂失城此為周師喪
敗元定被擒殷亮誅死及帝失長沙巴陵河東

諸郡之應○帝遣柱國王操帥師會周宇文直
元定權景宣與陳師戰于沌口敗績大將軍李
廣死之皎既內附陳慮皎先發乃前遣湘州刺
史吳明徹率衆三萬乘金翅直趨郢州又遣淳
于量率衆五萬乘大艦以繼之又令楊文通黃
法慧章昭達程靈洗等叅謀討皎皎求救于周
使者至長安帝亦上書言狀且乞師于是周武
遣其弟衛國公宇文直長湖公元定荊州總管
權景宣率人馬三萬來赴帝遣柱國王操等率

水軍二萬與皎俱會于夏口直令定率步騎數千圍郢州吳明徹等水陸來拒以定已渡江勢分遂先與水軍交戰皎以大艦載薪因風放火俄而風轉自焚火敗皎與僧朔單舸奔江陵定无復船渡食盡被執而李廣先登力戰及皎軍敗亦為明徹所擒將降之廣辭色不屈遂被害贈太尉追封建興縣公謚曰忠武由是長沙巴陵並陷于陳直字豆羅突周文帝之子武帝之母弟也性浮詭貪狠无賴魏恭帝三年封秦郡

公武成初進衛國公建德三年進爵為王以憤怨謀反誅定字願安河南洛陽人有勇略每戰必陷陣然未嘗自言其功以襄虜將軍從魏孝武四遷封高邑縣男進封長湖郡公既被陳人所執送詣丹陽居數月憂憤發病卒景宣字暉遠天水顯親人曉兵權有智略以攻拔襄城功封顯親縣男進爵千金郡公沌口之戰以驕縱納賄將士莫肯用命致敗宇文直欲繩以軍法朝廷赦之尋卒明徹字通昭秦郡人也雅性剛

直微涉書史孤虛遁甲略通其妙頗以英雄自許陳武深竒之以平杜龕功封安吳縣侯進爵南民平郡公統衆北伐敗于清口為周將王軌所擒以憂憤遘疾卒于長安○帝殺柱國殷亮宇文直以軍敗懼罪乃歸罪于柱國殷亮帝雖以退敗不獨在亮狀不敢違命遂誅之○陳吳明徹陷河東守將許孝敬死之孝敬吳人小名嗣兒勁勇過人為宣帝時驍勇以大將軍守河東吳明徹乘勝來攻既无救援城陷為明徹所

擒遂戮于建康市贈車騎大將軍○東平王岌薨詔贈司空謚曰孝

六年陳吳明徹寇京師僕射王操及周副總管高琳擊敗之時吳明徹進寇江陵引江水灌城帝與江陵總管田宏出保紀南城以避其銳唯王操與琳固守江陵三城以抗之晝夜拒戰凡經十旬軍主馬武吉徹等擊明徹敗之明徹退保公安帝乃還江陵琳字季珉其先高句麗人也以寧朔將軍從魏孝武西遷拒高歡有功封

鉅野縣侯進封捷為郡公及拒退明徹帝表言其狀乃進授大將軍卒贈本官謚曰襄○冬十一月陳安成王頊廢其主伯宗為臨海王

七年春正月陳主頊立○左氏尚書蔡大業卒詔贈金紫光祿大夫謚曰簡有五子允恭最知名○尚書僕射劉盈卒盈彭城人以西中郎將錄事參軍隨宣帝之鎮有器度勤于在公宣帝之軍國經謀頗得參預歷黃門郎中書監雍州刺史尚書僕射卒贈本官第三子狀于時頗知

名隋鷹擊郎將○度支尚書傅準卒準北地人祖照金紫光祿大夫父譖湘東王外兵參軍準有文才善詞賦以西中郎參軍隨宣帝之鎮官至度支尚書卒贈太常卿謚曰敬康所著文集二十卷有二子曰秉曰執並材兼文史秉尚書右丞執中書舍人尚書左丞

八年春正月

九年陳遣章昭達寇京師王師與陸騰李遷哲等擊破之陳遣昭達率衆五萬船艦二千來寇

江陵帝告急于襄州宇文直遣大將軍趙閭李
遷哲等率步騎赴之並受江陵總管陸騰節度
遷哲率其所部守江陵外城陳將程文季雷道
勤夜來掩襲遷哲等驚亂不能抗禦騰夜開門
出甲士奮擊大破之陳人奔潰道勤中流矢而
斃文季僅以身免虜獲三百餘人陳人又決龍
川寧邦隄引水灌江陵城城中驚擾遷哲乃先
塞北隄以止水又募驍勇出擊之頻有斬獲衆
心稍定俄而敵入郭內焚燒民家遷哲自率騎

出南門又令步兵自北門出兩軍合勢首尾邀
之陳人復敗多投水而死是夜陳人又窺十城
西堞以梯登者已數百人遷哲又率驍勇扞之
陳人復潰俄而大風暴起遷哲乘闇出兵擊其
營陳人大亂殺傷甚衆陸騰復親率將士戰于
西隄破之斬首數千級陳人乃遁昭達字伯通
吳興武康人也性倜儻輕財尚氣天嘉元年追
論長城之功封欣樂縣侯進封邵陵郡公卒贈
大將軍騰字顯聖代人也少慷慨有大節以平

李廣嗣功封上庸縣公進位柱國大司空卒謚
曰定遷昭字孝彥安康人也少修立有識度慷
慨善謀略以討蠻酋蒲微功封西城縣公進爵
安康郡公卒贈金州總管謚曰壯武○陳人寇
青泥大將軍許世武赴援敗績時帝與周軍大
蓄舟艦于章陵之青泥中昭達分遣偏將錢道
戢等乘輕舟襲之焚其舟帝遣大將軍許世武
赴援周兵又於峽下南岸築壘名曰安蜀城于
江上橫引大索編葦為橋以度軍糧昭達乃命

軍士為長戟施于樓船之上仰割其索索斷糧
絕因縱兵以攻城乃陷世武孝敬之子少襲父
為大將軍好勇不拘行檢重賓客施與不節資
產既盡鬱鬱不得志遂謀奔陳事覺伏誅○度
支尚書宗如周卒如周南陽人有才學容止詳
雅以府僚隨宣帝歷黃門散騎列卿後至度支
尚書如周面狹長以法華經云聞經隨喜面不
狹長嘗戲之曰卿何為謗經如周跋踏自陳不
謗宣帝又謂之如初如周懼出告蔡大寶大寶

知其旨笑謂之曰君當不謗餘經政應不信法
華耳如周乃悟又嘗有人訴事于如周謂為經
作如州官也某有屈滯故來訴如州官如周曰
爾何小人敢呼我名其人慙謝曰祇言如州官
作如州不知如州官名如周早知如州官名如
周不喚如州官作如周如周乃笑曰命卿自責
見侮反深衆咸服其寬雅有七子希顏希華知
名希顏有文學仕至中書舍人希華博通經術
為荆楚儒宗

十年冬十二月周以基平都三州來歸初華皎
戴僧朔與陳人戰敗率其麾下數百人歸于帝
帝以皎為司空封江夏郡公以僧朔為車騎將
軍封吳興縣侯皎因朝周至襄陽謂宇文直曰
梁主既失江南諸郡民少國貧朝廷興亡繼絕
理宜資贍豈使齊桓楚莊獨擅救衛復陳之美
望借數州以裨梁國直狀之乃遣使言狀周武
許之詔以基平都三州歸之于帝
十一年春正月

十二年散騎常侍沈君游卒君游吳興人祖僧
叟左民尚書父廵東陽太守君游博學有詞采
位至散騎常侍卒有文集十卷

十三年夏五月周廢佛道二教初周武定三教
先後以儒為先道為次釋為後至是遂禁佛道
二教經像悉毀沙門道士並還俗時江陵大明
寺乃宣帝所建以旃檀像歸之而天皇寺明帝
置也內有栢堂張僧由為畫盧舍那佛及仲尼
十哲帝恠問釋門如何畫孔聖僧繇曰後當賴

此耳及是廢滅佛法焚天下寺塔獨以此殿有
宣尼像乃不令毀拆

十四年侍中尚書令王操卒初吳明徹來寇帝
出頓紀南操撫循將士莫不用命明徹既退江
陵獲全操之力也遷侍中中衛將軍尚書令開
府儀同三司參掌選事領荊州刺史操既位居
朝右每自挹損深得當時之譽及卒帝學哀于
朝堂流涕謂其羣臣曰天不使吾平蕩江表何
奪吾賢相之建也及葬親祖于瓦官門贈司空

進爵為公謚曰康節

十五年帝至自周周武帝平北齊得傳國璽帝至鄴朝賀帝入周畿大冢宰命有司致積其餼五牢米九十筥醢醢各三十五甕酒十八壺米禾各五十車薪芻各百車既至大司空設九僮以致帝束帛乘馬設九介以待之禮成而出明日帝朝受享于廟既致享大冢宰又命一公元冕乘車陳九僮以束帛乘馬致食於賓及賓之從各有差致食訖又命公一人弁服乘車執贄

設九僮以勞賓帝設九介迎於門外明日朝服乘車還贄于公公皮弁迎于大門授贄受贄并于堂之中楹又明日帝朝服設九介乘車備儀衛以見于公事畢公致享明日三孤一人又執贄勞于帝明日帝還贄又明日帝見三孤如見三公明日卿一人又執贄勞帝帝見卿又如三孤于是三公三孤六卿又各餼賓並屬官之長為使牢米束帛同三公周武雖以禮接帝朕未之重也帝知之因宴承間乃陳其父荷太祖拯

救之恩并敘二國艱虞唇齒犄角之事辭理辯
暢因涕泗交流周武為之歔歎自是大加賞異
禮遇日隆後武帝大嘗羣臣及諸蕃客齊氏故
臣吒列長又亦預焉武帝指謂帝曰是登陴罵
朕者也帝曰長又未能輔桀翻敢吠堯武帝大
笑及酒酣武帝自彈琵琶令故齊主高緯起舞
達磨支故安德王延宗悲不自勝緯舞訖仍謂
帝曰當為梁主盡歡帝乃起請舞武帝曰梁主
乃能為朕舞乎帝曰陛下既親抚五絃臣何敢

不同百獸周武大悅賜雜繒萬段良馬數十疋
并賜齊後主妓妾及常所乘五百里駿馬遣歸
國執帝手曰待破突厥必送梁主歸江東帝經
途古跡莫不駐馬賦詩以叙其懷至于江陵凡
三十首

十六年以都官尚書沈重為太常卿重自以入
周既久且年過時制表請還梁周武帝優詔答
之曰開府漢南杞梓每軫虛衿江東竹箭亟疲
延首故束帛聘申蒲輪徵伏加以梁朝舊齒結

綬三世沐浴思先祗承寵渥不忘慈本深足嘉
尚而楚材晉用豈无先哲方事求賢義乘來肅
重固請乃許焉遣小司門上士楊注送之梁主
帝拜至散騎常侍太常卿○夏六月周主邕殂
太子贇立

十七年春二月周主贇傳位于太子闡○中書
黃門侍郎范迪卒迪順陽人祖縝尚書左丞父
胥鄱陽內史迪少機辯善屬文歷中書黃門侍
郎尚書右丞散騎常侍天保十七年卒有文集

十卷子裏

十八年是歲為周宣帝大象元年先是周武帝
改元為宣政帝離合其字為宇文亾曰其年六
月周武果崩至是帝復離合大象二字為天子
冢明年周宣亦崩

十九年夏五月周主贇殂○柳莊聘十周時周
宣帝崩詔以隋文輔政帝令莊奉書入闕時三
方構難隋文懼帝有異志及莊還謂莊曰孤昔
以開府從役江陵深蒙梁主殊眷今主幼時艱

猥蒙雁託中夜自省實懷慚懼梁主奕葉重光
委誠朝廷而今已後方見松筠之節相與共保
歲寒耳君還本國幸申孤此意予梁主也遂執
莊手而別時梁之將帥咸潛請興師與尉遲廻
等為連衡之勢進可以盡節于周氏退可以席
卷山南唯帝疑為不可會莊至自長安具申隋
文結託之意遂言于帝曰昔袁紹劉表王陵諸
葛誕之徒並一時之雄傑也及據要害之地擁
哮闕之羣功業莫建而禍不旋踵者良由魏武

晉氏挾天子保京都仗大義以為名故能取威
定霸今尉廻雖曰舊將昏耄已甚消難王謙常
人之下者非有匡合之才况山東庸蜀從化日
近周室之恩未洽在朝將相多為身計競效節
于楊氏以臣料之迴等終當覆滅隋公必移周
國未若保境息民以觀其變帝深以為狀衆議
遂止未幾消難奔陳迴及謙相次就戮帝謂莊
曰近者若從衆人之言社稷已不守矣隋文踐
阼莊又入朝隋文深慰勉之及為晉王廣納妃

于梁莊因是往來四五反前後賜物數千段廣
運元年遷太府卿及梁亡入隋授開府儀同三
司尋除給事黃門侍郎并賜以田宅

二十年春二月周隋王堅稱皇帝○隋遣使來
聘隋文既踐極息禮彌厚遣使賜金五百兩銀
千兩布帛萬疋馬五百疋○都官尚書王湜卒
湜澁之弟方雅有器識位至都官尚書天保二
十年卒子懷秘書郎隋汜陽令
二十一年春正月陳主頊殂太子叔寶立○隋

遣使來逆帝女隋煬帝蕭皇后明帝之女也江
南風俗二月生子者不舉后以二月生由是季
父東平王岌收而養之未幾岌夫妻俱死轉養
舅氏張軻家狀軻甚貧窶后躬親勞苦隋煬為
晉王隋文將為王選妃于梁遍占諸女皆不吉
帝迎后于舅氏令使者占之曰吉於是遂備禮
納后策為王妃后性婉順有智識好學解屬文
頗知占候隋文大善之王甚寵敬焉及嗣位詔
曰朕祇承丕緒憲章在昔爰建長秋用承饗荐

妃蕭氏夙稟成訓婦道克修宜正位軒闈式宏
柔教可立為皇后帝每游幸后未嘗不隨從時
后見帝失德心知不可不敢厝言因為述志賦
以自寄其詞曰承積善之餘慶借箕帚于皇庭
恐修名之不立將負累于先靈迺夙夜而匪懈
實寅懼于元冥雖自強而不息亮愚矇之所滯
思竭節于天衢才追心而弗逮實庸薄之多幸
荷隆寵之嘉惠賴天高而地厚屬王道之升平
均二儀之覆載與日月而齊明迺春生而夏長

等品物而同榮願立志於恭儉私自兢于戒盈
孰有念于知足苟无希于濫名唯至德之宏深
情不適于聲色感懷舊之餘恩求故劍于宸極
叨不世之殊盼謬非才而奉職何寵祿之踰分
抚胷襟而未識雖沐浴于恩光內慚惶而累息
顧微躬之寡昧思令淑之良難實不遑于啟處
將何情而自安若臨深而履薄心戰栗其如寒
夫居高而必危慮處滿而防溢知恣夸之非道
乃攝生于冲謚嗟寵辱之易驚尚无為而抱一

履謙光而守志且願安乎容膝珠簾玉箔之奇
金屈瑤臺之美雖時俗之崇麗蓋吾人之所鄙
愧絺綌之不工豈絲竹之喧耳知道德之可尊
明善惡之由已蕩囂煩之俗慮乃伏膺于經史
綜箴誠以訓心觀女圖而作軌遵古賢之令範
冀福祿之能綏時循躬而三省覺今是而昨非
嗤黃老之損思信為善之可歸慕周妣之遺風
美虞妃之聖則仰先哲之高才貴至人之休德
質菲薄而難蹤心恬愉而去惑乃平生之耿介
實禮義之所遵雖生知之不敬庶積行以成仁
懼達人之蓋寡謂何求而自陳誠素志之難憑
同絕筆于獲麟及帝幸江都臣下離貳有宮人
白后曰外聞人人欲反后曰任汝奏之宮人言
于帝帝大怒曰非所宜言遂斬之後人復白后
曰宿衛者往往偶語謀反后曰天下事一朝至
此勢已狀无可救也何用言之徒令帝憂煩耳
自是无復言者及宇文氏之亂隨軍至聊城化
及敗没于竇建德建德妻曹氏妒悍煬帝妃嬪

美人並使出家并后置于武強縣是時突厥處
羅可汗方盛其可汗敦即隋義城公主也遣使
迎后于洺州建德不敢留遂携其孫正道及諸
女入于虜庭大唐貞觀四年破突厥皆以禮致
之歸于京師賜宅于興道里二十一年殂詔以
皇后禮于揚州合葬于煬帝陵謚曰愍○封皇
子景臨海王瑒晉陵王珣南海王瑒義安王瑤
新安王璟等入隋璟歷朝議大夫尚衣奉御秘
書監瑒子欽貝州刺史珣歷左光祿大夫梁國

公食邑三千戶贈遷州刺史子鉅鈞鉅小名藏
嗣為梁公煬帝甚昵之以為千牛與宇文晶出
入宮掖伺察內外每有游宴鉅未嘗不從遂於
宮中多行淫穢江都之變為宇文化及所殺鈞
終唐太子率更令鈞生渝州長史灌灌生嵩相
元宗年踰八十卒贈開府儀同三司二子華衡
華相肅宗為李輔國所忌貶峽州司馬卒二子
恒悟恒為殿中侍御史恒生俛相穆宗以太子
太傅卒于家悟為大理司直悟生倣相僖宗以

鯁直為權近所忌以司空蘭陵侯卒年八十衡尚新昌公主為太僕卿駙馬都尉五子戡復異升鼎復相德宗以廢居饒州卒年五十七次子湛湛生寘相懿宗无顯功寘生邁相僖宗為孔璋所譖賜死瑒衛尉卿秘書監封陶丘侯初晉王廣欲以其妹蘭陵公主配瑒隋文帝許之不果後適河東柳述晉王因不悅及述用事彌惡之隋文既崩煬帝徙述嶺表令主與述離絕將改嫁之主以死自誓表請與述同徙帝大怒不

從主憂憤而卒瑒字時文九歲封新安王國除以女兄為隋晉王妃故入長安瑒愛經術善屬文性鯁急鄙遠浮華嘗以劉孝標辯命論詭悖不經乃著論非之以為人稟天地而生而謂之命至吉凶禍福則繫諸人今一于命非先王所以教人者通儒柳顧言諸葛穎歎曰是足鍼孝標膏肓矣晉王為太子授千牛即帝位妃為后而瑒寢親寵頻遷尚衣奉御檢校左翊衛鷹揚郎將感末疾不呼醫曰天若假吾餘年因得為

遁階矣后聞貴謂曰爾亡國後不安小官而高
為恠語罪不測瑀復治疾良已拜內史侍郎教
言事忤旨稍見忌遂出為河池郡守部有鈔賊
萬人吏不能制瑀募勇敢士擊降之悉捐贖畜
賜有功又擊走薛舉數萬唐高祖入京師招之
挈郡自歸授光祿大夫封宋國公拜民部尚書
武德元年遷內史令帝委以樞筦內外諸務悉
關決或引升御榻呼曰蕭郎瑀自力孜孜抑遏
繩違无所憚上便宜每見納用貞觀中以太子

少師尚書左僕射參預政事帝嘗曰武德季太
上皇有廢立議顧朕挾不賞之功于昆弟弗見
容瑀于此時不可以利怵死懼社稷臣也因賜
詩曰疾風知勁艸板蕩識誠臣又曰公守道耿
介古无以過然善惡太明或有時而失卒年七
十四詔贈司空荊州都督陪葬昭陵太常謚曰
肅帝以其性忌改謚貞褊子銳尚襄城公主為
太常卿銳孫定以六州刺史治竄遷戶部侍郎
太常卿以不浼于賊擢太子少師卒年七十七

贈太師○秋九月江水赤如血自荊州至建康
凡數千里洪範五行傳曰火水沴也五行變節
陰陽相干氣色繆亂皆敗亂之象京房易占曰
水化為血兵且起又曰賢人潛國家危厥異水
流赤不五年而後主入隋不遣安平王巖等引
陳人悉虜江陵男女奔陳國遂亡又二年而隋
破建康陳亦亡○冬十二月隋罷江陵總管隋
文既納帝女為晉王妃又欲以帝子瑒尚蘭陵
公主由是漸見親待獨孤皇后言于隋文曰梁

主通家腹心所寄何勞猜防也上狀之於是罷
江陵總管得專制其國

二十二年散騎常侍太常卿沈重卒天保十九
年重朝于周歸未幾卒年八十有四隋文帝遣
舍人蕭子寶祭以少牢贈使持節上開府儀同
三司許州刺史重學業諛博為當世儒宗至于
陰陽圖緯道經釋典靡不畢綜又多所撰述咸
得其指要其行于世者周禮義三十一卷儀禮
義三十五卷禮記義三十卷毛詩義二十八卷

喪服經義五卷周禮音一卷儀禮音一卷禮記音二卷毛詩音二卷

二十三年帝至自隋帝朝于隋次于郊外詔平王揚雄吏部尚書韋世康持節以迎衛尉設次于驛館雄等降就便幕帝服通天冠絳紗袞端珽立于東階下西面文武陪侍如梁國雄等立門右東面帝攝內史令柳顧言出門請事世康曰奉詔勞于梁帝顧言入告帝出迎於館門之外西面再拜持節者導雄與帝俱入至于庭下

帝北面再拜受詔訖雄等乃出于館門外道右東向帝送于門外西面再拜及奉見隋文冠通天冠服絳紗袞御大興殿如朝儀帝服遠游冠朝服以入君臣並拜禮畢而出先是隋文踐極帝朝于隋隋文甚敬焉詔帝位在王公之上帝被服端麗進退閑雅隋文矚目百僚傾慕賜以億計月餘歸藩隋文親餞于滻水之上至是復朝于隋賜縑萬匹珍玩稱是及還隋文親執手曰梁主久滯荆楚未復舊都故鄉之念良軫懷

抱朕當振旅長江相送旋及耳帝拜謝而還
二十四年夏五月帝崩葬顯陵是年五月帝寢
疾臨終上表隋文曰臣以庸闇曲荷天慈寵冠
外藩恩踰連山爰及子女尚主婚王每願躬擐
甲胄身先士卒掃蕩逋寇上報明時而攝生乖
舛遽罹痾疾屬纊在辰顧陰待謝長違聖世感
戀嗚咽遺嗣孤藐特乞降慈伏願聖躬與山岳
同固皇基等天日俱永臣雖九泉寔无遺恨并
獻所服金裝劍隋文覽而嗟悼焉帝在位二十

三年年四十四及崩羣臣葬帝于顯陵謚曰孝
明皇帝廟號世宗帝孝悌慈仁有君人之量四
時祭享未嘗不悲慕流涕性尤儉約御下有方
境內稱治所著文集及孝經周易義記及大小
乘幽微十四卷行于世明帝纂業親賢並用將
相則華皎殷亮劉忠義宗室則蕭欣蕭翼民望
則蕭確謝溫柳洋王湜徐岳外戚則王凝王誦
殷璉文章則劉孝勝范迪沈君游君公柳信言
政事則袁敞柳莊蔡延壽甄詡皇甫茲故能保

其疆土而和其人民焉平顯二陵在荊州城北
四十里紀山之陽梁亡隋文各給守墓十戶唐
韓休二陵碑曰有梁拓跡開統建邦立號皇業
始于憂勤霸功興于海縣乃昭事上帝惠綏遠
人文軌通于四表正朔繼乎三代厲天步未夷
皇綱中圯巨猾開豐大盜潛移宗廟鞠為禾黍
衣冠剪為戎狄則我梁之業將墜于地國之郊
裡蓋无主矣而天未絕商鼎猶祀夏炎精翳而
復揚文德懿而方肇明命斯在神休允歸則我

中宗宣皇帝世宗明皇帝乘彼樂推抚其歸運
者矣宣皇帝諱晷明皇帝諱歸姓蕭氏蘭陵中
都里人也房雲祚商大火封宋功昭草夏之業
德盛明周之禮故能慶緒崇緬哲源浩濬樂叔
之封既命遂列于諸侯高辛之祚克昌俱有于
天下始宋公子食菜于蕭國以得氏其後居于
豐沛自漢丞相何侍中彪奕世載美不忝前烈
洎于裔孫整東晉淮陰令始渡江居于南徐州
之蘭陵焉整生雋及鎔雋曾孫道成是為齊高

帝鎔以四代孫丹陽尹順之生高祖武皇帝衍
高祖生昭明皇帝統宣皇帝即昭明皇帝之子
明皇帝即宣皇帝之子也降元精之吉乘正陽
之氣星斗發祉日衡兆祥德叶于天地之和名
書于帝王之籙故其本枝崇慶歷試肇跡勿用
而履夫重剛明夷而蒙彼大難乃鞠旅樊沔投
戈雍梁政始東國化行南紀取長沙而兵不血
刃戰江夏而舉旻遺策推賢用之而如不及委
政授之而心不疑誅獍羿而廓天閔埽欃槍而

清帝座遂抚方夏用膺徽號訓兵同于一旅申
命式于九圍克祗上靈之睭光啓中興之業于
斯時也飛鴻滿野戎馬生郊庭旅荆棘室同煨
燼由是躬大禹之菲薄同衛文之節儉千里襁
負一年成都適其樂國歸我有道者盖同于遷
幽而居此也於是菟夢澤朝渚宮五德配天二
郊在國不失舊物重覩漢官之儀叶于新命還
秉宗周之禮用能布令結援修好申盟我譽延
乎四方人心洽于一德始則誕受多福終亦繼

明重熙豈惟敵國挫師克申威武信亦強隣結
好芬若椒蘭謹其外虞宏我邦本孝心虔于紱
冕儉德過于茆茨立教以至仁為宗宏風以清
淨為樂豈非古之聰明神武而不殺者夫方欲
觀兵上國清蹕中壤混一區宇削平四方而乾
道臨于大過雄圖屈于短運霸功則肇王業未
宏雖慷慨于當年竟遲回于卒歲者矣嗚呼陵
谷驟改市朝无處荒坟歸狀蔓艸蕪沒孟嘗尊
貴獨愴雍門之言魏武英威空留士衡之吊有

可悲矣嗣子琮属金陵畢氣天祿永終山川不
出于伯苻歷數有同于歸命終我梁祚是為虞
賓其天意也豈人事也次子珣梁南海王隋左
光祿大夫梁國公食邑三千戶贈遷州刺史承
百祀之重稟二宗之慶恩昭異代禮崇備物于
鈞皇朝中書舍人率更令崇賢宏文兩館學士
鈞子灌皇朝渝州長史贈吏部尚書疇其慶靈
俾爾戩穀盛名昭于海內高秩謝于人寰實彰
燕翼之宜克享褒崇之禮嗣子曰嵩金紫光祿

大夫吏部尚書兼中書令河西節度經略度支
營田九姓長行轉運等副大使知節度事判梁
州事赤水軍使檢校天下諸軍兵募健兒使集
賢院太學士上柱國徐國公秉靈迪哲体道宏
正自我人秀惟其國禎亮采而三階已平疇咨
而九功式叙糾易王慝緝熙邦政文武体用清
明在躬地奉紫垣之寵門延絳河之貴水言孝
思式是前烈雖大統云集而鴻芬莫記時逢喪
亂跡昧于亡隋之年運屬光華功盛于有唐之

日丘墟遂遠碑表莫存豈使配天之功不勒于
金石終古之美永翳于丘山式繼武于烝夷俾
披文于大隧緬思至道俯課虛懷幸陪論政之
餘空媿知音之託乃為銘曰天祚我梁受命而
王於穆烈祖昭唯武皇德配華夏功成剪商克
受丕祉宏茲太康陰極為剝泰終而否九代未
修四郊多壘戎江孔熾王室如燬不有繼明孰
彰世祀四子有命二宗代興歷數攸在天人叶
徵靈心允洽元德昭升奄有成命其歸與能長

江作限上京未復永念殊邦思同比屋拔山雖
壯逝水何速嗣王不辰終我天祿洪惟德門卓
彼孝孫弼我王道宏其政源式播前烈貽厥後
昆勒茲琬琰永馥蘭蓀已矣焉哉昭丘一望盡
烟埃楚塞斷分荆門開緬千里以環繞見二陵
之崔嵬銅臺虛兮總帳暗金扃兮黃鳥哀鳴
呼百年人畏其神者豈獨軒轅之臺史臣曰明
帝纂承舊業增修遺構賞罰得衷舉措有方密
邇寇讎則威略具舉朝宗上國則聲猷遠振豈

非繼世之令主乎○安成王欣卒時後主嗣位
贈欣司空有集三十卷又著梁史百卷遭亂失
本初欣以文詞擅名所敵擬者唯河東柳信言
狀柳內雖不伏而莫敢與抗及聞欣卒時柳為
吏部尚書賓客候之見其屈一脚跳連稱曰獨
步來獨步來衆賓皆舞忤以為笑樂

後主

廣運元年隋遣使來錫璽書後主嗣位隋文賜
璽書曰負荷堂構其事甚重雖窮憂勞常須自

力輯諧內外親任才良聿遵世業是所望也彼
之疆守咫尺陳人水潦之時特宜警備陳氏皆
雖復朝聘相尋疆場之間猶未清肅唯當恃我
必不可干勿得輕人而不設備朕與梁國積世
相知重以親姻情義彌厚江陵之地朝寄非輕
為國為民深宜抑割恒加饒粥以禮自存又賜
梁之大臣璽書誠勉之時年號廣運有識者曰
運之為字軍走也吾君當為軍所走乎○以安
平王巖為太傅尚書令巖以廣運二年奔陳受

平東將軍開府儀同三司東揚州刺史及陳亡
百姓推巖為王以禦隋師宇文述進至奉公埭
巖與陳君範等面縛路左以會稽請降述許之
開皇八年伏法于長安○以吏部郎蔡延壽為
御史中丞延壽大寶之次子也有器識博涉經
史尤善當世之務尚宣帝女宣成公主歷中書
郎尚書右丞吏部郎御史中丞從後帝入隋授
開府儀同三司秘書丞終於成州刺史○大將
軍戚昕伐陳公安不克後主遣昕以舟師襲陳

公安不克而還未幾梁亡昕與安平王巖奔陳
昕嘗以青龍百餘艘守狼尾灘以拒楊素為劉
仁恩擊敗悉俘其衆素勞而還之○隋復置江
陵總管○隋來徵吳王岑王自以望重屬尊頗
有不法故隋文徵人朝拜大將軍封懷義郡公
因留不遣○大將軍許世武伏誅世武密以城
召陳將宜黃侯陳紀謀洩後主誅之○有鳥集
帳隅後主新起後有鴝鷓集其帳隅京房易飛
候曰野鳥入君室其邑虛君亡之他方未幾帝

入隋不遣而梁亡矣

二年江陵寺銅像流汗初晉永和六年二月八
日夜有像現于荊州城北長七尺五寸合光趺
高一丈一尺皆莫測其所從也時大司馬桓溫
鎮牧躬事頂拜沙門曇翼奉安本寺太元中嘗
夜出寺西門邏者謂人問而不答以刀擊之鏗
狀視乃像也有罽賓僧伽難陀禪師者多識博
觀從蜀來荆入寺禮像歎咽久之翼問其故曰
近天竺失之如何遠降此土便勘像光背梵文

曰阿育王造也其後歷宋齊梁每以放光為瑞
流汗為沴大定七年像復流汗而宣帝崩天保
十五年明帝迎像入內禮懺冥感二十三年帝
崩後主移像于二壽宮又大流汗而梁國遂亡
○秋八月後主大去其國是年隋文徵後主率
臣下二百餘人朝于長安江陵父老莫不殞涕
相謂曰吾君其不反矣隋以後主來朝遣武鄉
公崔宏度為江陵總管將兵戍之軍至郟州後
主叔安平王巖及弟義興王瓌等懼宏度掩襲

之遣使請降于陳陳荊州刺史陳慧紀引兵至
江陵巖等率其部眾驅文武男女二萬餘口奔
陳隋文聞之于是廢梁國遣左僕射高頻安集
之曲赦江陵死罪給民復十年尋拜後主為柱
國封莒國公自大定元年歲在乙亥至廣運二
年歲在丁未凡三十有三歲而亡煬帝嗣位後
主以皇后之故甚見親重拜內史令改封梁公
梁之宗族總麻以上並隨才擢用于是諸蕭昆
弟布列朝廷後主性澹雅不以職務自嬰退朝

縱酒而已內史令楊約與後主同列煬帝令約
宣旨誠勵約復以私情喻之後主答曰琮若復
事事則何異于公哉約笑而退約兄素時為尚
書令見後主嫁從父妹于鉗耳氏因謂後主曰
公帝王之族望高戚美何乃適妹鉗耳氏乎後
主曰前已嫁妹于侯莫陳氏此復何疑素曰鉗
耳羗也侯莫陳虜也何得相比素意以虜優羗
劣後主曰以羗異虜未之前聞素慙而止後主
雖羈旅見北間豪貴无所降下嘗與賀若弼深

相友善弼既被誅復有童謠曰蕭蕭亦復起煬
帝由是忌之遂廢于家未幾而卒贈左光祿大
夫子鉉位襄城通守集州刺史史臣曰後主大
去其邦因而无反遂為外戚不事自持蓋亦守
滿之道也

後梁春秋下



元旦免朝
賀正是日
當是學
照挂珠
左の
迎春
の
勢

